



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË DHËNAVE PERSONALE DREJTORIA E PËRGJITHSHME PËR MBROJTJEN E TË DHËNAVE PERSONALE DREJTORIA E ANKESAVE DHE HARMONIZIMIT

Nr.355/1 prot.

Tiranë më 20.3.2023

Lënda: Kthim përgjigje kërkesës së deputetëve.

KUVENDIT TË REPUBLIKËS SË SHQIPËRISË

ZNJ. DHURATA ÇUPI

Z. SAIMIR KORESHI

Tiranë

Pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim, “Zyra e Komisionerit”), është depozituar kërkesa juaj, lidhur me pretendime për përpunim të paligjshëm të të dhënave personale përmes aplikacionit “Aktiv1st”, i cili administrohet nga Kontrolluesi Partia Socialiste e Shqipërisë, si dhe kërkoni nga ana e Zyrës së Komisionerit fillimin e menjëhershëm të një hetimi administrativ lidhur me këtë aplikacion.

Fillimisht, vlerësojmë angazhimin tuaj për të sjellë në vëmendje respektimin e legjislacionit për mbrojtjen e të dhënave personale, si një fushë tepër e ndjeshme dhe delikate, e cila synon ruajtjen e dinjitetit njerëzor, duke garantuar të drejtën për respektimin e jetës private dhe familjare, parashikuar nga neni 8 i Konventës Evropiane për të Drejtat e Njeriut (KEDNJ). Edhe në legjislacionin shqiptar mbrojtja e jetës private dhe të dhënave personale është një nga liritë dhe të drejtat themelore të njeriut, e sanksionuar në nenin 35 të Kushtetutës së Republikës së Shqipërisë, Ligjin nr. 9887, datë 10.03.2008 “Për mbrojtjen e të dhënave personale” i ndryshuar (në vijim “Ligji 9887”), së bashku me aktet nënligjore.

Zyra Komisionerit në cilësinë e autoritetit publik të pavarur, që mbikëqyr dhe monitoron, në përputhje me ligjin, mbrojtjen e të dhënave personale, e ka marrë në shqyrtim edhe më herët këtë aplikacion, pas publikimit përmes mediave për përpunimin e të dhënave personale që kryhet në këtë platformë. Analiza paraprake e bërë nga ana jonë, i referohet kompozimit të kësaj platforme, të dhënave personale që përpunon, përputhshmërisë së proceseve përpunuese, në raport me parimet dhe kriteret ligjore të përpunimit, si dhe

respektimit të detyrimeve të sanksionuara në legjislacionin kombëtar në fushën e mbrojtjes së të dhënave personale.

Lidhur me shqetësimet e ngritura dhe sensibilitetin për respektimin e disa prej kërkesave kryesore të Ligjit si: Garantimi i pëlqimit të subjekteve të të dhënave, si një nga kriteret ligjore bazë për përpunimin e të dhënave personale; përmbushja e detyrimit për informim ndaj subjekteve të të dhënave personale; realizimi i detyrimit për njoftim; marrja e masave për sigurinë e të dhënave personale apo ruajtja e konfidencialitetit, ju bëjmë me dije se janë trajtuar nga ana jonë, duke bërë analizën dhe vlerësimet përkatëse, sipas përmbajtjes në vijim.

Nga verifikimet që kemi kryer rezulton se, Aplikacioni “*AktivIst*”, gjendet si në Google Playstore, po ashtu edhe në APP STORE, dhe mund të shkarkohet nga klientët e këtyre platformave. Sipas informacionit që jepet për aplikacionin, ndër të tjera, detajohet se, aplikacioni “*AktivIst*” ka për qëllim që: *“Ti japë mundësinë çdo personi që ka ide dhe dëshirë, të jetë pjesëmarrës në gara lokale ose kombëtare, të çojë përpara nismat e tij, si dhe të jetë një faktor aktiv në komunitetin ku jeton.”*

Evidentohet se, përdoruesi përpara se të vijojë me instalimin dhe përdorimin e aplikacionit, duhet të pranojë **“Kushtet e Përdorimit”**, në përmbajtje të së cilës informohet subjekti i të dhënave se: *“Duke u regjistruar në platformën e aktivistit ju jeni dakord me kushtet e përdorimit dhe ju jepni pëlqimin/miratimin tuaj për përdorimin e të dhënave personale të cilat do të përpunohen në përputhje të plotë me përcaktimet e ligjit 9887/2008 “Për mbrojtjen e të dhënave personale”.* Pra, përpara se përdoruesi të regjistrohet në mënyrë përfundimtare në këtë aplikacion duhet të jap pëlqimin për **“Kushtet e Përdorimit”**.

Në këtë kuadër, lidhur me sensibilitetin për garantimin e pëlqimit të dhënë lirisht nga subjektet e të dhënave personale, që bëhen pjesë e këtij komuniteti virtual, konstatohet se, përdoruesi ka mundësinë që të njihet me Politikën e Privatësisë së këtij aplikacioni, në rubrikën Informacione *“Data safety”*, në sesionin *“Security practices”*, dhe çdo veprim i mëtejshëm për shkarkimin dhe përdorimin e tij, është tërësisht në vullnetin e lirë të vetë përdoruesit.

Më tej, nga shqyrtimi i të dhënave teknike dhe të përgjithshme në Google play, rezulton se, PlayStore informon çdo përdorues mbi disa funksionalitete të aplikacionit. Në rubrikën *“Data Safety”*, jepet një përshkrim i përgjithshëm se si zhvilluesi i aplikacionit, mbledh dhe ndan të dhënat e përdoruesve. Gjithashtu, në rubrikën Informacione *“Data safety”*, në sesionin *“Security practices”*, mund të shikohet rubrika *“Politika e Privatësisë”* së zhvilluesit të aplikacionit, përmes së cilës i jepet mundësia kujtdo që dëshiron të shkarkojë këtë aplikacion, që të ketë informacion paraprak mbi përpunimin e të dhënave personale përmes kësaj platforme. Ky sesion informues i jep mundësinë subjekteve të të dhënave që të informohen mbi proceset përpunuese, përpara se të marrin vendim për shkarkimin ose jo të këtij aplikacioni.

Në këtë kuadër, nga verifikimet, kemi konstatuar se zhvilluesit e kësaj platforme e kanë strukturuar këtë rubrikë “*Politika e Privatësisë*” në mënyrë që subjekti të dhënave të ketë një informacion paraprak mbi përpunimin e të dhënave personale, përpara marrjes së vendimit përfundimtar për t’u bërë pjesë e këtij komuniteti virtual.

Sa i takon realizimit të detyrimit për njoftimin ndaj Zyrës së Komisionerit, si një detyrim i parashikuar në nenin 21 të Ligjit 9887, sjellim në vëmendje se, Vendimi nr. 4, datë 27.12.2012 i Komisionerit “*Për përcaktimin e rasteve për përjashtimet nga detyrimi për njoftimin e të dhënave personale, që përpunohen*”, në pikën 1/a të tij parashikon se “*Njoftimi për përpunimin e të dhënave personale, pranë Komisionerit për Mbrojtjen e të Dhënave Personale, nuk është i nevojshëm kur përpunimi i këtyre të dhënave kryhet nga organizatat jofitimprurëse politike, sindikaliste, fetare ose filozofike, për qëllime të veprimtarisë së tyre të ligjshme, për anëtarët, sponsorizuesit ose personat e tjerë, që kanë lidhje të vazhdueshme me veprimtarinë e këtyre organizatave*”, për rrjedhojë Kontrolluesit përjashtohen nga përgjegjësia për të njoftuar në këtë rast.

Një shqetësimin tepër i ndjeshëm që është ngritur edhe më herët mediatikisht, është fakti se ndaj nëpunësve të administratës shtetërore po ushtrohet presion dhe se punonjësit po urdhërohen në mënyrë të paligjshme për shkarkimin e këtij aplikacioni. Lidhur me këtë fakt, vlerësojmë t’ju bëjmë me dije se Zyra e Komisionerit nuk ka administruar asnjë ankesë nga vetë subjektet e të dhënave, megjithatë, në çdo rast verifikimi dhe marrja e masave në këtë kuadër, është tërësisht jashtë kompetencave ligjore të Zyrës së Komisionerit. Kuadri ligjor në fuqi në Republikën e Shqipërisë, ka parashikuar një sërë instrumentash të tjerë që mund të shfrytëzohen për t’u ankuar ndaj urdhrave të paligjshëm të eprorëve të institucioneve, (*Ligji nr. 152/2013 “Për nëpunësin civil”, i ndryshuar, Kodit i Punës së Republikës së Shqipërisë; Ligji nr. 9131, datë 8.9.2003 “Për rregullat e etikës në administratën publike”, etj*).

Së fundi, Zyra e Komisionerit mbetet plotësisht e angazhuar për të ndjekur me vëmendje rastet e përpunimit të të dhënave personale nga të gjithë kontrolluesit dhe përpunuesit, me qëllim identifikimin e rasteve të cilat shkelin detyrimet ligjore të sanksionuara në legjisllacionin e mbrojtjes së të dhënave personale.

Duke ju falënderuar,

KOMISIONERI

Besnik Dervishi